

**ZAPISNIK**  
**O RADU PETE RADNE SJEDNICE SKUPŠTINE KANTONA SARAJEVO ODRŽANE**  
**24.03.2023.GODINE SA POČETKOM RADA U 09,00 SATI**

Petu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovalo 29 zastupnica i zastupnika, a u daljnjem toku su se priključili i ostali, kako slijedi:

**SDA - STRANKA DEMOKRATSKE AKCIJE**

1. Dević Mahir
2. Izetbegović Sebija
3. Kalem Adi
4. Selmanović Faruk
5. Viteškić Smiljana
6. Zahiragić Haris

**POLITIČKA ORGANIZACIJA "NAROD I PRAVDA"**

1. Čampara Aljoša
2. Kristić Danijela
3. Mehmedagić Mersiha
4. Memić Arijana
5. Okerić Elvedin
6. Pobrić Rusmir
7. Vreto Elvis

**SOCIJALDEMOKRATSKA PARTIJA BOSNE I HERCEGOVINE**

1. Avdić Samir
2. Čengiće Irfan
3. Čičić Davor
4. Kapo Belma
5. Magoda Kenan
6. Pekić Jelena

**POLITIČKA ORGANIZACIJA GRAĐANA "NAŠA STRANKA"**

1. Bešlija Vildana
2. Handžić Vibor
3. Klarić Sanela
4. Melank Miomirka
5. Uk Nihad

**STRANKA ZA BOSNU I HERCEGOVINU**

1. Bandić Muamer

2. Gaković Elza
3. Gavrankapetanović-Smailbegović Fatima
4. Hodžić Admela
5. Šaljić Jasmin

#### **DEMOKRATSKA FRONTA**

1. Zuhrić Albin
2. Hašimbegović Marijela
3. Pilav Ilijaz
4. Vujović Vedrana

#### **POLITIČKA ORGANIZACIJA/INICIJATIVA “ZA NOVE GENERACIJE”**

1. Marjanović Damir

Izostanak sa ove sjednice nije pravdao niko od zastupnika.

Nakon intoniranja državne himne, predsjedavajući je pozdravio zastupnice i zastupnike u Skupštini Kantona Sarajevo, članove Vlade Kantona Sarajevo, sve prisutne u sali, kao i predstavnike medija koji prate rad sjednice.

Prije prelaska na utvrđivanje dnevnog reda predsjedavajući je upoznao zastupnike da je na osnovu Odluke Centralne izborne komisije Bosne i Hercegovine, broj: 06-1-07-1-63/23 od 9. 2. 2023. godine Mersihi Mehmedagić sljedećoj kvalificiranoj kandidatkinji sa listi političkog subjekta Narod i Pravda za Opće izbore 2022. godine dodijeljen mandat zastupnika u Skupštini Kantona Sarajevo.

Također, na osnovu Odluke Centralne izborne komisije Bosne i Hercegovine broj: 06-1-07-1-88/23 od 20. 3. 2023. godine, Belmi Kapo sljedećoj kvalificirane kandidatkinje sa liste političkog subjekta SDP-Socijaldemokratska partija Bosne i Hercegovine za Opće izbore 2022. godine dodijeljen mandat zastupnika u Skupštini Kantona Sarajevo.

Potom je pozvao zastupnice Mersihu Mehmedagić i Belmu Kapo da pristupe davanju svečane izjave, u skladu sa članom 8. Poslovnika Skupštine Kantona Sarajevo.

Nakon polaganja svečane izjave predsjedavajući je uputio čestitke novoimenovanim zastupnicama.

U radnom dijelu sjednice, predsjedavajući je istakao da je Prijedlog dnevnog reda 5. Radne sjednice Skupštine Kantona Sarajevo utvrdio Kolegij Skupštine na sjednici održanoj dana 09.03.2023.godine.

*Potom je dao Dnevni red za Petu radnu sjednicu Skupštine Kantona Sarajevo na izjašnjavaње i isti je usvojen većinom glasova (21 „ZA“, niko protiv i 8 „SUZDRŽANIH“), kako slijedi:*

1. Poslanička/zastupnička pitanja, inicijative i odgovori;
2. Prijedlog Odluke o potvrđivanju Vlade Kantona Sarajevo;
3. Prijedlog Odluke o izmjeni Odluke o potvrđivanju kandidata za mjesto predsjedavajućeg ili zamjenika predsjedavajućeg Skupštine Kantona Sarajevo.

## TOK SJEDNICE

Realizacija prve tačke dnevnog reda je počela u 9:15 sati.

### AD – 1.

## POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku i dao riječ zastupnicima.

**Zastupnik Jasmin Šaljić je podnio sljedeće (citiramo):** „Javio sam se za inicijativu povodom zemljotresa koji je prošli mjesec pogodio regiju Turske i Sirije, pa pokrećem inicijativu prema Skupštini Kantona Sarajevo i Vladi kantona Sarajevo da pomognemo da iznađemo sredstva u skladu sa mogućnostima. Boravio sam prošli mjesec u akciji spašavanja pa sam na terenu lično vidio o kakvim se tu procjepima radi i problema. Boravio sam u selu "nerazumljivo", što u prijevodu znači "Selo siročadi". Ono se nalazi u naselju "nerazumljivo", to je oko 40 km od Antakije, a uz sirijsku granicu nekih 100 i 200 m. U tom "Selu siročadi" smješteno je oko 3000 siročadi iz Sirije i regije Hataj i prije i nakon zemljotresa. Oni imaju krov nad glavom, imaju uslove, njima je problem hrana, pa vas molim da ove koji kreiraju Budžet da im ja ne govorim s koje stavke da probamo pomoći u skladu sa mogućnostima za kupovinu hrane i higijenskih sredstava. I također da pošaljemo ispred Kantona, ispred Skupštine i Vlade Kantona Sarajevo ili ispred ove Komisije za međudržavnu saradnju jednu delegaciju u regiju Hataj da vidimo na koji način možemo da pomognemo na, tamo je sada faza deratizacije, dezinfekcije, znači suzbijanje zaraze. Mi imamo takve ljude jer smo u periodu covida isto radili i kod nas u Sarajevu pa pa znači samo stvar je dobre volje i što se tiče puta evo ja sam spreman da snosim dio troškova, možemo ići jednim službenim vozilom, a neka delegaciju odredi rukovodstvo, Kolegij i i eto, o tome se možemo dogovoriti naknadno“.

**Predsjedavajući** je podsjetio sve prisutne da je Skupština Kantona Sarajevo na samom početku usvojila inicijativu zajedno sa svim klubovima u Skupštini Kantona Sarajevo da se u Budžetu Kantona Sarajevo za 2023. godinu planiraju određena sredstva koja će biti usmjerena za pomoć Siriji i Turskoj.

**Zastupnica Smiljana Viteškić je podnijela sljedeće (citiramo):** „Upućujem inicijativu Ministarstvu saobraćaja da u skladu sa članom 86 Zakona o uređenju saobraćaja na području Kantona Sarajevo izradi pravilnik kojim se definiše postupak i način uklanjanja oštećenih, dotrajalih, napuštenih i neregistrovanih vozila i olupina, te da pristupi izradi propisa o visini troškova premještanja vozila i olupina u skladu sa pomenutim zakonom. Istu inicijativu je uplaćivala ranije u ranijem mandatu zastupnica Hasagić, a uvrštena je prijedlog Zakona o uređenju saobraćaja, međutim prema informacijama kojima raspolažemo pomenuta problematika nije još riješena. Moje pitanje je, drugo pitanje, upućeno Zavodu za javno zdravstvo Kantona Sarajevo, da li je u 2022/ 23. godini bilo prijava zoonoza, konkretno Q groznice i Bruceloze, i ako jeste da li su locirani izvori zaraze, što je učinjeno po pitanju prekida zaraze i prevencija bolesti? Obrazloženje je u prilogu. I još jedno zastupničko pitanje. Zašto učenici koji pohađaju Srednju školu "Richmond park" školu u Francuske revolucije bez broja ne mogu ostvariti pravo na prijevoz sa đakom iskaznicom? Kratko obrazloženje. Škola jest privatna, međutim smatram da je nedopustivo da se srednjoškolci diskriminišu na osnovu pohađanja privatne škole roditelji djece često posežu za kupovinom radničkih iskaznica i kupona i nadam se da će ovaj problem uskoro riješiti. Ostala pitanja ću dostaviti pismeno.“.

**Zastupnica Sebija Izetbegović je podnijela sljedeće (citiramo):** „Dakle ja imam jedinu inicijativu i ona se odnosi na zahtjev da Ministarstvo zdravstva na čelu sa ministrom Vranićem dostavi elaborat o trenutnom stanju u zdravstvenom sistemu Kantona Sarajevo u smislu dostave imena svih uposlenih, njihove strukture profila, kao i dinamiku upošljavanja u svim javno zdravstvenim ustanovama Kantona Sarajevo po godinama. Također uz ovaj elaborat potrebno je dostaviti i plan razvoja koje Ministarstvo zdravstva eventualno ima ili možda nema, za razvoj zdravstvenog sistema u Kantonu Sarajevo. Također moj zahtjev pitanje je zbog čega Vlada Kantona Sarajevo ministar Vranić nikad nisu odgovorili na pitanje zbog čega se ne daje konkretno objašnjenje za nedavanje saglasnosti upošljavanja u Klinički centar Univerziteta u Sarajevo na mjesto onih kadrova koji su otišli u penziju ili su eventualno umrli. To je već veliki broj i mi stalno dostavljamo urgencije. Dostavili smo ih preko 11. Također bih postavila jedno pitanje a to je i ranije postavljeno, nismo na to dobili odgovor, a odnosilo se na liste čekanja i na spisak onih uposlenika koji su u javnom zdravstvenom sistemu na plaćama, odnosno na budžetu, a svi rade privatno, imaju dozvole od ministra Vranića za rad, želimo da se dostavi njihov učinak u toku rada u javno zdravstvenim ustanovama“.

**Zastupnica Marijela Hašimbegović je podnijela sljedeće (citiramo):** „ Za 5 radnu sjednicu pripremila sam jednu zastupničku inicijativu koju ću sada pročitati i dva pitanja koja sam dostavila na službenu e-mail adresu. Dakle, pokrećem inicijativu za otvaranje ureda za mobing i zaštitu dostojanstva radi prisutnosti ove negativne društvene pojave koja poprima sve šire razmjere sa ciljem prevencije i zaštite ljudskih prava ljudi koji su na radnom mjestu izloženi raznim oblicima neprihvatljivog ponašanja koje šteti dostojanstvu čovjeka, ugrožava njegovo zdravlje, fizičko i mentalno, ugrožava zdravlje njihovih porodica ili može kompromitovati žrtvinu profesionalnu budućnost. Mobing je sociološko- zdravstveni problem i svakako pravno pitanje koje podrazumijeva normativno uobličavanje sistema prevencije i zaštite od svih oblika nasilja na radnom mjestu. Pravni normativi po pitanju mobinga ostavljaju žrtvi samo jednu mogućnost, a to je sudski proces putem kojeg mora dokazivati mobing , što je dodatna trauma za žrtvu koja je replicira već proživljeno složeno iskustvo. Ideja inicijative je pružiti pomoć našim građanima u prvom koraku kojeg se često iz straha od gubitka posla ne usuđuju učiniti. Ured za mobing i zaštitu dostojanstva treba pružiti besplatnu pravnu i psihološku pomoć, izvršiti prvu prevenciju prema žrtvi i svakako posredovati u lancu djelovanja ombudsmen-poslodavac i u krajnjem slučaju Tužilaštvo. Ured bi također radi o registru prijavljenih za vršenje mobinga. Ovakve mjere će vjerujem napraviti promjenu i kod onih koji se služe ovakvim oblicima ponašanja na radnom mjestu kojih je sve više u javnom i realnom sektoru, a za žrtve mobinga vrsta zaštite koja je vrlo važno kada se žrtve osjećaju same i napuštene. Ukoliko se zalažemo za društvo temeljeno na vrijednostima demokracije, tolerancije, pluralizma, te zaštite ljudskih prava, važno je osigurati sveobuhvatnu zaštitu i podršku žrtvama mobinga. Također je važno osigurati saradnju između javnog sektora, akademske zajednice, civilnog društva sa ciljem podizanja svijesti o zaštiti ljudskih prava. Pravni okvir za pokretanje ove inicijative prepuštam Vladi Kantona u nadi da će se prepoznati važnost ove inicijative i svakako u dobroj namjeri preporučujem provjeriti primjere dobre prakse iz regije“.

**Zastupnik Damir Marjanović je podnio sljedeće (citiramo):** „ Vrlo kratko, podnosim inicijativu. Naime u skladu sa Zakonom o objavljivanju propisa i drugih općih akata u "Službenim novinama Kantona Sarajevo" i Uredbom o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo stvorena je određena obaveza da se sve javne ustanove obavezuju da opće akte objave u "Službenim novinama Kantona Sarajevo". Ne ulazeći u meritum cijele priče, ne ulazeći u opravdanost ili neopravdanost jedne ovakve Uredbe s obzirom da već postoji obaveza da se svi javni akti objave i daju prema javnosti u sklopu web stranica navedenih ustanova, mogu samo da primijetim da ovom Uredbom i ovim rješenjem Vlade Kantona Sarajevo stvorena je velika finansijska obaveza, posebno za institucije iz oblasti kulture, gdje recimo kad želite da objavite jedan javni akt čini mi se dobije se predračun iz narodnih novina, ustvari Službenih novina od nekoliko hiljada maraka. Stoga pokrećem

inicijativu u dva pravca; ili u pravcu da se ustanove iz oblasti kulture izuzmu od ove uredbe ili opcija dva da Vlade Kantona Sarajevo obezbijedi novac za izvršavanje ove Uredbe zato što , koliko smo vidjeli u nacrtu Budžetu i u Prijedlogu Budžeta ove godine ustanove neće moći ispuniti finansijski ovu svoju obvezu, a sam time će doći do toga da krše zakon i uredbe Vlade Kantona Sarajevo, a mislim da to niti jedan direktor javne ustanove iz oblasti kulture ne bi htio da uradi. Stoga ovu inicijativu ću dostaviti normalno pismenim putem. Neću traži da se glasa o njoj, očekujem da će biti pošto ima određenih finansijskih reperkusija ali ako vidim da u nekom narednom periodu ne bude uvažena inzistirat ću da se Skupština Kantona Sarajevo izjasni o njoj“.

**Zastupnik Faruk Selmanović je podnio sljedeće (citiramo):** „Ja imam dva pitanja. Prvo pitanje upućujem Vladi Kantona Sarajevo, Ministarstvu zdravstva kantona Sarajevo gospodinu Vraniću, Uredu za borbu protiv korupcije i upravljanje kvalitetom Kantona Sarajevo. Na protokol Kantona Sarajevo zaprimljen je dopis na upoznavanje broj 193 /2022 od 8. 11. 2022. godine koji je upućen na ruke ministra zdravstva gospodina Harisa Vranića, na dopisu koji je upućen od strane Saveza ratnih vojnih invalida Kantona Sarajevo, do danas nikad nije odgovoreno. Također isti je dopis upućen na ruke direktorice ortopedske kuće Otto Bock d.o.o. Sarajevo na koji također nikad nije dobijen odgovor. U dopisu Saveza ratnih vojnih se navodi da je dana 11. 3. održan sastanak sa ortopedskom kućom Otto Bock d.o.o. Sarajevo na kojem je dogovoreno da se uradi donacija za dva visokokvalitetna i sofisticirana ortopedska pomagala, podlaktna proteza i nadkoljena proteza noge, te da se pošalju imena i prezimena za proteze. U dopisu iz Saveza ratnih vojnih invalida navodi se da se na portalu javnih nabavki Ministarstva zdravstva koji objavi 14. 10. 2022. godini vidjelo da ortopedska kuća Otto Bock Sarajevo tu donaciju fakturisala Ministarstvu zdravstva Kantona Sarajevo, a s obzirom da se radilo o većoj sumi novca, a radilo se samo o dvije proteze, poslali su dopis u kojem traže odgovor, na ruke ministra Vranića. Zahtijevam da mi hitno kao zastupnika informišete, izvršiti analizu, kao i usmeni inspekcijski nadzor da li se radilo o donaciji ili ne. Ako se ne radi o donaciji, kako je moguće da ova ortopedska kuća direktno kontaktirala Savez jer je moralo ići na tender, koliko je isplaćeno sredstava iz Ministarstva zdravstva, ako nije bila donacija, koje su sve ortopedske kuće dobile sredstva iz Ministarstva zdravstva i koliko je dobila ortopedska kuća Otto Bock u zadnje dvije godine. Molim usmeni i pismeni odgovor na ovo pitanje. A moje drugo pitanje na koje molim pismeni odgovor. Upućuje ga Vladi Kantona Sarajevo, Ministarstvu za visoko obrazovanje Kantona Sarajevo i Rektoratu univerziteta u Sarajevu. Naime pitanje se odnosi zbog čega Rektorat Univerziteta u Sarajevu nije potpisao Odluku Vijeća Elektrotehničkog fakulteta u Sarajevu o izboru dekana? Naime izbor dekana Elektrotehničkog fakulteta je izvršen na osnovu javnog konkursa čije je tekst identičan tekstu konkursa na svim drugim fakultetima. Naime ovdje se problematizira tekst konkursa na Elektrotehničkom fakultetu a nije problematiziran isti tekst konkursa na ostalim fakultetima čije odluke o izboru rukovodilaca je blagovremeno potpisan. Nadalje tražimo da Rektorat se očituje zbog čega nije blagovremeno reagovao prije objave ili u tok trajanja konkursa ukoliko smatra da je tekst konkursa za izbor dekana nije usklađen sa zakonom, iako je isti objavljen na web stranici Univerziteta u Sarajevu. Da li se svjesno čekalo da se okonča kompletna procedura i reagira kad bude izabran dekan? Rektorat je bio u obavezi da na objavljeni tekst konkursa na web stranici Univerziteta u Sarajevu reaguje ukoliko je smatrao da postoji bilo kakva njegova zakonska neusklađenost i tražiti da se isti uskladi sa zakonom, što nije učinjeno.“.

**Zastupnik Muamer Bandić je kazao sljedeće (citiramo):** „Okolnost je da danas imamo i ovaj džumu tako da ja ovu svoj zastupničku inicijativu neću čitati već ću je u pismenoj formi podnijeti“.

**Zastupnik Mahir Dević je podnio sljedeće (citiramo):** „Pitanje za ministra finansija Kantona Sarajevo. Tačan podatak o izvršenju kapitalnog djela Budžeta Kantona Sarajevo u potpunosti je na neki način Budžet realiziran. Znači postotak realizacije Budžet kapitalnog djela Budžeta Kantona Sarajevo 2022. godinu, tražim usmeni odgovor, sa posebnim osvrtom na realizaciju priče o nabavci

helikoptera u Kantonu Sarajevo koju već slušamo ovaj u protekle 3 godine, a vidimo da na neki način postoji i Prijedlogu budžeta za 2023. godinu. Ne znam da li ministar sada ima taj podatak da ne bi pravili pauzu. Treba mi usmeni odgovor radi građana Kantona Sarajevo. Znači po ministarstvima kapitalni dio izvršenja Budžeta, usmeni odgovor. Imam jednu inicijativu također prema ministru saobraćaja, ukoliko je tu volio bih da me čuje. U toku je trenutno rekonstrukcija dijela ulice ili ulice od autobuske stanice u Ilijašu prema Karašnici. Ono što sam ja vidio ono što je nacrtano na cesti što se radi trenutno jest jedan cirkus u kome treba da se isiječe dio ceste, da se ubaci ne znam nekih 20, 30 ili 50 ivičnjaka koji su potpuno propali. Paralelno s tim kocke koje su ustvari trotoari su potpuno potrošene i uništene, te vas molim da se ministre aktivno uključite u rekonstrukciju ovog dijela ulice zato što u ovo se nalazi u užem ovaj centru grada Ilijaša i onako kako se krenulo raditi, ja ću vam dostaviti slike kako to izgleda, mislim da će to biti jedno ruglo. Ukoliko su stekli uslovi da se urade trotoari kako treba jer su potpuno propali onda to treba uraditi u potpunosti ovo kako se sada radi uopće nije dobro. Informišite se preko Direkcije za ceste Kantona Sarajevo. Ovo što je sada na stanju, što vidimo sada, a naravno da ću se aktivno uključiti ovaj u realizaciju ovog projekta, ne izgleda uopće dobro, pa vas pozivam evo nek to bude inicijativa da se uključite da ispratite ovaj ovaj projekat do kraja. A zamolit ću na ovo prvo pitanje po resorima da mi se odgovori oko kapitalnog djela Budžeta izvršenja. Ukoliko je ministar u mogućnosti da to uradi, ukoliko nije nek uzme neku pauzu 10 ili 15 minuta pa nam da usmeni odgovor kao zastupnicima“.

**Zastupnica Admela Hodžić je podnijela sljedeće (citiramo):** „Ja danas imam jednu inicijativu, jedno pitanje. Upućujem pitanje ministru saobraćaja gospodinu Šteti. Molim vas da mi odgovorite što je prije moguće na osnovu čega je izmijenjen red vožnje na štetu građana općine Hadžići, odnosno smanjen broj linija te potpuno ukinut posljednji polazak za liniju 33 Ilidža- Vukovići u 22.30? Podnosim inicijativu Vladi Kantona Sarajevo da se u što kraćem vremenskom periodu kreiraju programi, izdvoje potrebna sredstva za subvencioniranje izgradnje solarnih panela za domaćinstva u Kantonu Sarajevo, kao i sva moguća tehnička i stručna pomoć koja će služiti da se građanima koji to žele brzo i efikasno pomogne u realizaciji izgradnje solarnih panela za domaćinstva. Obrazloženje: iako naša zemlja nema strategiju, struka smatra da se Bosna i Hercegovina nalazi na jednoj od najboljih evropskih, ali i svjetskih lokacija kada je u pitanju proizvodnja električne energije iz solarnih panela. Prema mišljenju struke fotonaponski sistem kapaciteta od 5 kW bio bi dovoljna za potrebe jednog domaćinstva. Instaliranjem fotonaponskog sistema građani mogu proizvoditi električnu energiju, slati je u mrežu i koristiti onda kada to treba. Samim tim njihovi računi za električnu energiju na godišnjem nivou će biti znatno smanjeni. Uz to će građani biti manje ovisni jer mi ne znamo šta nas čeka u budućnosti sa energetsom tranzicijom. Nažalost Bosni i Hercegovini još uvijek se ne subvencionira gradnja fotonaponskih solarnih panela u domaćinstvima što nije slučaj u zemljama regiona. U susjednoj Hrvatskoj se već nekoliko godina ugradnja subvencionira od 40 do 80 % od ukupnog iznosa ugradnje ili 19.500 KM. U susjednoj Srbiji od 21. godine ugradnja solarnih panela u domaćinstvima subvencionira se sa 50 % od ukupnog troška ugradnje. Molim nadležne da što prije razmotre ovu inicijativu i dostave odgovor.“.

**Zastupnica Jelena Pekić je podnijela sljedeće (citiramo):** „Naime moje pitanje zastupničke je upućeno prema Ministarstvu pravde i uprave Kantona Sarajevo. Pitanje glasi, zašto nije predložen Zakon o lokalnoj samoupravi Kantona Sarajevo u skladu Zakonom principima lokalne samouprave u Federaciji Bosne i Hercegovine i Programom rada Vlade Kantona Sarajevo za period. 2022. godine. Navedeni zakon treba da prethodi izrada novih amandmana na Ustav Kantona Sarajevo jer je implementacija amandmana na Ustav Kantona iz 2017. godine u praksi predstavljala problem, veliki izazov naročito Gradu Sarajevo i općinama koje čine Grad Sarajevo. Za postavljanje ovog pitanja me inspirisala sjednica Gradskog vijeća Grada Sarajevo, održana ove sedmice, a gdje je usvojen novi Statut Grada Sarajeva nakon 15 godina, što je zaista pohvalno za trenutno rukovodstvo Grada Sarajeva. To je bilo moje pitanje. I još samo ću nadopuniti inicijativu koju je prezentovao kolega Magoda u ime Kluba SDP-a da tražimo izjašnjenje Skupštine o istoj, a budući da ista ne

podrazumijeva izjašnjenje Vlade Kantonu Sarajevo, tako da se može postupiti izjašnjenju od strane Skupštine“.

Nakon iscrpljene liste prijavljenih za pitanja i inicijative, predsjedavajući je kazao da se u skladu sa članom 212 Poslovnika odgovori na poslanička pitanja mogu dostavljati usmeno i pismeno, a cijeneći da tek slijedi potvrđivanje nove Vlade, kao i džuma namaz, čime je vrijeme ograničeno.

Potom se Skupštini obratila ministrica pravde i uprave Darja Softić-Kadenić, u funkciji v.d. premijera i kazala sljedeće (citiramo): „Hvala još jednom. Srdačan pozdrav svim danas prisutnim zastupnicima i zastupnicama Skupštine, svim gledaocima Skupštine preko TV ekrana. Ja bih vas molila najljubazniji iako danas nije bilo pitanje koje je bilo upućeno direktno meni nego nekim od ministara, da s obzirom na dnevni red današnji i na sve druge okolnosti na koje evo predsjedavajući skrenuo pažnju, danas imate razumijevanja za to da će članovi Vlade svoje odgovore dostaviti pismenim putem“.

Iskoristivši poslovničku intervenciju, zastupnik Mahir Dević je izrazio svoje negodovanje jer nije dobio odgovor na pitanja za koja je tražio usmeni odgovor, ali je prihvatio obrazloženja okolnosti u kojima se održava sjednica, na čemu mu se predsjedavajući zahvalio.

Prešlo se na realizaciju druge tačke dnevnog reda.

**AD-2.**

## **PRIJEDLOG ODLUKE O POTVRĐIVANJU VLADE KANTONA SARAJEVO**

Zastupnici su Prijedlog odluke, kao i biografije kandidata za premijera i ministre, dobili uz poziv za sjednicu.

Predsjedavajući Skupštine je podnio uvodne napomene u ime Predlagača, Komisije za izbor i imenovanja i administrativna pitanja, koji je predsjedavajući iste. Potom je pozvao kandidata za premijera Kantona Sarajevo, Nihada Uka, da iznese svoj ekspoze i ukratko predstavi kandidate za ministrice i ministre u budućoj Vladi Kantona Sarajevo.

Nakon obraćanja gospodina Uka, predsjedavajući je otvorio mogućnost za postavljanje pitanja.

Pitanja su postavili zastupnice i zastupnici: Mahir Dević, Marijela Hašimbegović, Haris Zahiragić, Damir Marjanović, Sebija Izetbegović, Vedrana Vujović, Adi Kalem.

Mandatar za premijera, gospodin Nihad Uk je zamolio za pauzu, obzirom na veliki broj pitanja koji je upućen, te je predsjedavajući predložio da se zastupnici izjasne o mogućnosti da se objedini pauza za pripremu odgovora i za obavljanje džuma namaza, tako da nastavak sjednice bude s početkom u 13:30 sati.

Prijedlog za pauzu je podržan većinom glasova (20 „ZA“, 6 „protiv“ i niko suzdržan).

### **NASTAVAK NAKON PAUZE**

U nastavku sjednice, predsjedavajući je dao riječ mandataru, gospodinu Uku, da ponudi odgovore na postavljena pitanja, nakon čega je otvorena mogućnost za diskusiju u kojoj su učestvovali zastupnice i zastupnici: Mahir Dević, Sebija Izetbegović, Haris Zahiragić, Samir Avdić, Muamer Bandić, Albin Zuhrić, Irfan Čengiće, Damir Marjanović, Davor Čičić, Vībtor Handžić.

Nakon iscrpljenih diskusija, predsjedavajući je pozvao zastupnice i zastupnike da se izjasne o Prijedlogu odluke o potvrđivanju Vlade Kantona Sarajevo u cjelini, u skladu sa članom 205 stav (1) Poslovnika Skupštine Kantona Sarajevo.

*Skupština je većinom glasova (22 „ZA“, 10 „protiv“ i 2 „suzdržana“) donijela Odluku o potvrđivanju Vlade Kantona Sarajevo.*

Potom su novoimenovani članovi Vlade Kantona Sarajevo položili svečanu izjavu.

Predsjedavajući Skupštine je u svoje ime i u ime rukovodstva Skupštine i svih zastupnika čestitao novoj Vladi na imenovanju i zaželio im puno sreće u daljnjem radu.

Također je iskoristio priliku da se zahvali ministricama i ministrima u prethodnom sazivu Vlade na doprinosu koji su dali i zaželio im je svako dobro u životu i u njihovim narednim poslovnim i životnim planovima.

*Realizacija tačke tri.*

**AD-3.**

### **PRIJEDLOG ODLUKE O IZMJENI ODLUKE O POTVRĐIVANJU KANDIDATA ZA MJESTO PREDSEDJEDAVAJUĆEG ILI ZAMJENIKA PREDSEDJEDAVAJUĆEG SKUPŠTINE KANTONA SARAJEVO**

Zastupnici su materijal dobili uz poziv za sjednicu.

Uvodna izlaganja po ovoj tački podnijela je predsjednica Kluba Srba u Skupštini Kantona Sarajevo, Miomirka Melank, koja je zastupnike upoznala s Prijedlogom odluke Kluba Srba koji predlaže Jelenu Pekić kao kandidata za izbor na mjesto predsjedavajućeg ili zamjenika predsjedavajućeg Skupštine Kantona Sarajevo iz reda srpskog naroda umjesto dosadašnjeg kandidata Igora Stojanovića.

Pitanja je postavio zastupnik Haris Zahiragić. Pošto nije bilo prijavljenih za diskusiju predsjedavajući je pozvao zastupnike da pristupe izjašnjavanju o Prijedlogu odluke o izmjeni Odluke o potvrđivanju kandidata za mjesto predsjedavajućeg ili zamjenika predsjedavajućeg Skupštine Kantona Sarajevo.

*Skupština je jednoglasno (25 „ZA“) donijela ovu Odluku.*

Predsjedavajući je čestitao zastupnici Jelini Pekić na izboru za mjesto predsjedavajućeg ili zamjenika predsjedavajućeg Skupštine KS.

Konstatovano je da je iscrpljen dnevni red Pete radne sjednice Skupštine Kantona Sarajevo, te je predsjedavajući zaključio sjednicu i zahvalio se kolegicama i kolegama na radu.

Zapisnik izradila:

Lejla Kadrić

**SEKRETAR**

**SKUPŠTINE KANTONA SARAJEVO**

**Aida Zeković**

**PREDSEDJAVAJUĆI**

**SKUPŠTINE KANTONA SARAJEVO**

**Elvedin Okerić**



**Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.**